

30 mahasiswa UMP terima insentif kecemerlangan

KUANTAN - Seramai 30 mahasiswa **Universiti Malaysia Pahang (UMP)** yang cemerlang dengan keputusan nilai gred 3.5 ke atas bagi setiap semester terpilih menerima insentif kecemerlangan (Platinum) Yayasan UMP.

Inisiatif itu diperkenalkan sebagai suntikan semangat kepada mahasiswa untuk terus mengekalkan kecemerlangan dalam akademik sehingga tamat pengajian.

Pengerusi Lembaga Pengarah UMP, Datuk Seri Ibrahim Ahmad berkata, mahasiswa yang terpilih adalah terdiri daripada mereka yang pernah menerima bantuan awal pendidikan daripada Yayasan UMP sebelum ini.

Menurutnya, setiap penerima terpilih menerima insentif berjumlah RM500.

"Penerima insentif kecemerlangan (Platinum) yang diperkenalkan Yayasan UMP ini merupakan antara 250 penerima manfaat insentif pendidikan yaysan itu yang diperkenalkan sejak tahun 2016," katanya pada Majlis Penyerahan Insentif Kecemerlangan (Platinum) Yayasan UMP di Dewan Bankuet Canselor, UMP Gambang baru-baru ini.

Turut hadir, Naib Canselor UMP, Prof Ir Dr Wan Azhar Wan Yusoff dan ahli-ahli Lembaga Pengarah UMP.

Ibrahim berkata, berdasarkan data sehingga tahun 2025 dijangkakan sebanyak 70 peratus mahasiswa UMP merupakan mereka yang berlatar belakang keluarga dalam kelompok B40.



Ibrahim (barisan dua, tengah) bergambar bersama mahasiswa UMP di Dewan Bankuet Canselor, UMP Gambang baru-baru ini.

"Pihak Yayasan UMP dengan kerjasama Jabatan Hal Ehwal Pelajar dan Alumni (JHEPA) sentiasa mengangkat isu-isu kebajikan mahasiswa dan hal ehwal pendidikan menerusi penajaan biasanya, pengagihan bantuan zakat dan sara hidup mahasiswa, inisiatif 'campus pantry' serta bantuan pendidikan bagi mahasiswa baharu," katanya.

Beliau berkata, yaysan itu sentiasa mengumpul dana daripada pihak syarikat, institusi dan orang perseorangan untuk kebajikan mahasiswa UMP.

"Melalui dana ini kita membiayai program pendidikan, kemasyarakatan dan menyediakan kemudahan yang menyokong pembelajaran untuk dimanfaatkan mahasiswa universiti.

"Pada masa sama, UMP turut giat

menjalankan kempen 'Jom Berwakaf Bersama' bagi mengumpul dana Waqaf Kolej Kediaman Mawaddah UMP yang kini sedang dalam pembangunan di kampus UMP Pekan," katanya.

Beliau berkata, orang ramai yang berhasrat menyumbang boleh melayari portal mygift.ump.edu.my, untuk maklumat lanjut. Sumbangan boleh dibuat dengan memuat turun aplikasi SnapN-Pay, Portal (FPX) atau kemudahan potongan gaji bagi warga UMP.

Pada majlis sama, Ibrahim turut menyampaikan agihan bantuan zakat kepada 30 orang mahasiswa UMP yang disumbangkan oleh Permodalan Nasional Berhad (PNB) untuk meringankan beban kewangan dalam urusan pembelajaran di UMP.